

BROP GUILTS NE PQUIAA

JUAN

¡Diuzh to grēse to!

¹Laa tib zhagol rii rxeel tib guits rii ziaad lo to i, ne nac to zha ne no xnēz Jesús. Dios bzooblo to, bredz me to ne laa to ngab xnēz me.

Ne nlipaa rleynie naa to gon, ni led naadsegaa, sinque ye grēraa zha ne runbey diidzli ne nac Xtiidz Dios. ²Rleynie no to sacne tibaque nac diidzli ne riladz ne, ni tsod dze ne csaan new.

³Dios ni Jesús men ne nac Xpēed me, me glu ganle pa lotaa noxco me to, zeena peet tsienied guic to, ni yquia zdoo me to; ni zunpaa mew, sac rleyniedox me to.

⁴Ne nlipaa gon bleydoo naa zeene gon naa nzian zha ne nocaania Xtiidz Dios i, noxco zho mban zho zigne nacpaa diidzli; zigne rnabey Dios men ne nac Pxoze ne.

⁵Bets, bzian, laa naa rnab lo to, golgotsaa gleynie ne samiech ne. Guiabd ne togo ncub mine rne naa lo to nu gun to; sac gon, lēēquew ga bdzion ne zeene psilo bliladz ne Xtiidz Dios. ⁶Tejne nli rleynie ne Dios, dzigo none gban ne zigne rnabey me; gacxe waa, none niowse gban ne, ine gleynie ne samiech ne, sac gon min co rnabey me.

⁷Ndal zha ne quianzē lo guidzliu niina, noquidie zho miech, rnee zho nlid goc Jesús zig tib miech zeene baaad me lo guidzliu. Nsin golso lo zho, sac gon notsidil zho mine nac diidzli ga, rlēenie zho Jesús ga sca run zho. ⁸Golguien, ib gdeete to diidz guiaadquidie zho to, zeena dziin ne quiaayun to i gacda zhlēse. Goltsoxco tiblīque golgac, zeena yгаа to grētaa guielnzaac ne no needz Dios lo to. ⁹Sac gon, zha ne csaan mine nacpaa zhiwseed Jesús, led xnēzdraa Dios ga no zho; ni scagaa, zha ne zienalpaaw zigne naca, zha cosi xnēz Dios ga, xnēz Xpēed me Jesús ga no zho. ¹⁰Gacxe waa, zha ne guiaad lo to i ni tel ziaadnied zho wseed ne nacpaa Xtiidz Jesús, ycaaniade to zho. Ib gdeete to lidz to cuēz zho, ib tsoode to gnee to pe diidz ne csannziuu to zho; ¹¹sac telne sca gun to, rriequia yele to rleynie grē zhiwseed yozh zho ga.

¹²Ndal grë ncuaaṅe no gne naa lo to, per racladzd naa gzet naaw lo guits rii. Laa guic naa no guialgaṅ naa to i, dzigo mazd hor co naazhal gnew lo to; zeeṅa nroob guieḷbley ne dzio ne grë ne.

¹³Grë zha rii, zha ne bzooblo Dios bredz me zigne bredzaque me to bzëëb to xnëz me, laa zho rxeelḷ bdiuzh lo to grëse to. *Juan*